



新豊山脈圖志

ル 5
3546
3



門ル5
號 3546
卷 3

新疆山脈圖志卷三

新城王樹枏



天山三

又東北曰喀喇巴爾噶遜之山其上多金多銅多鐵

新疆圖說喀喇巴爾噶遜山原建嘉德城在迪化

城東南一百八十里今謂之達坂城新疆識略云

烏魯木齊鞏寧城其地即古車師後王庭其前王

庭即今吐魯番也自烏魯木齊東南越齊克達坂

五百三十里至吐魯番為正道可通車唐書地理

志交河縣北八十里至龍泉館又北入谷一百三

山脈三

一陶

廬

十里經柳谷度金嶺至北庭都護府地又宋史高昌傳王延德使高昌師子王邀延德至其北庭歷交河城按交河卽吐魯番北庭卽烏魯木齊所云經柳谷度金嶺者當卽齊克達巴罕一帶山也茲查迪化城南往吐魯番路惟達坂嶺可通車其卽當日之齊克達巴罕無疑

辛卯侍行記臘月初五日自白楊站西入峽四里出峽升陡坡又西多黃沙梁登降坎坷三里東北下坡踰乾溝緣沙梁行四里折北越十餘丈之坡又北多培塿十五里復入峽經溝中石磧四里溝

水淙淙流急不冰繞行曲岸有荒草小樹三里後溝土屋三間茨

棘爲籬行人饑焉後溝南七十里小草湖驛又一百里托克遜爲南路大道北負齊克達

坂蒙語嶺曰達巴罕急呼爲達坂天山一榦也祁韻士萬里行程記以此爲博克達坂屈曲而登

衆車更迭加驂七里至嶺巔小憩旋下有修路碑已仆六里

臨峻坂斜約四度繫馬車後多人挽之徐降車播不可

坐徒步攀援行行且止八里坂盡出峽道左荒店

一家半里下坂半里涉二澗寬丈餘深三尺有郵墅草木一

里半經廢堡周約二里回匪所築又渡澗二崖下有汎卡循山

迂繞一里半下坡過溝一里石磧中有廢壘三里

折西南二里達坂城驛迪化住南門外店街上下五十家計行

六十四里此地舊名喀喇巴爾噶遜

蒙語黑虎城也

乾隆四

十七年築嘉德城

周三里半

同治中陷於亂回光緒三

年春大軍由北路進攻以炸礮轟破雉堞皆平案嘉德城四面皆山有險可扼惟地氣極寒東北百餘里三角山有銅鑛用纏回三百人淘挖每銅一斤合銀二錢六分仍不敷經費城西南四十里有鐵鑛新疆仍用俄鐵價廉質精華人所治工本鉅銷路滯苦於賠累不敢開採

案齊克達坂卽七箇達坂西距喀喇巴爾噶遜三十餘里蓋一山也三州輯略新疆識略皆以

齊克達坂爲古之金嶺陶葆廉云新唐志交河縣北八十里龍泉館又北入谷百三十里經柳谷度金沙嶺百六十里經石會漢戍至北庭都護府宋王延德歷交河州六日至金嶺口又兩日至漢家砦又五日過金嶺一日至北庭按唐志交河至北庭祇三百七十里而延德緩行故閱十四日乃至此道蓋今白楊河東北經四道橋之路也和瑛三州輯略以齊克達坂爲王延德所過金嶺按延德度金嶺後一日卽至北庭唐志金沙嶺距北庭僅百六十里北庭故城在

今濟木薩東北余故疑延德所歷係溯白楊河
東北四道橋出山卽至濟木薩如以齊克達坂
爲金嶺則必西北經迪化折東經阜康乃至北
庭是距金嶺六七日與前史所言形勢不合今
四道橋之路商人多有行之者古之金嶺在濟
木薩南陶說是也達坂城大路古今不同今日
行車之路爲巡撫潘效蘇所修戊申七月遭水
冲決又在北二十里外之達坂舊路修築矣達
坂城地處兩山之間形勢險要爲南疆門戶同
治初年安夷帕霞防官軍南下與白彥虎移達

坂新城於兩山間堅厚倍常以大通哈

猶華言
大總管守

之又以次子海古拉據守托克遜扼南路總隘
亦築兩城相犄角而自居喀喇沙爾爲策應官
軍至一鼓而下達坂乘勝進攻遂復南疆耆定
後設守備一員防兵一營可以見其形勝矣其
山金鑛距迪化城一百八十里鐵鑛距城東南
二百里

又北曰博克達之嶺天山絕頂也其上有雲五色其下
有龍湫七箇達坂在其南其陰多銅鐵有草焉狀如芙
蓉六十年始花名曰石蓮嗅之頭痛有石焉名曰雲母

切之光可以鑑有蟲焉巨身而赤色重數十觔名曰雪
蛆其鳥多鸚鵡獸多狒狒木多松柏藥草多黃耆木通
知母貝母柴胡白朮茯苓黃連大黃黨參防風甘草當
歸細辛半夏牛膝獨活羌活前胡芍藥遠志川芎附子
沙參茺莢黃柏欵冬黃芩益智之屬其陰庫里葉圖及
多倫諸水出焉北流入於地

西域圖志博克達鄂拉在額得墨克達巴西天山
最高峰也東南距闢展二百里高八里山脈自烏
魯木齊東南之托克喇鄂拉折而東北行一百六
十里高峰突起爲迪化州境東北一大屏障托克

三郭勒發源南麓多倫庫里葉圖諸布拉克發源
北麓乾隆二十年討準噶爾二十二年追討阿睦
爾撒納大兵道出其麓二十五年西域平軍旅凱
旋咸祭告自是秩於祀典每歲春日致祭魏書高
昌傳北七里有貪汗山夏有積雪此山北鐵勒
界也隋書鐵勒傳大業元年突厥處羅可汗擊鐵
勒諸部遂叛拒處羅立俟利發俟斤契弊訶楞爲
易勿真莫何可汗居貪汗山莫何勇毅絕倫伊吾
高昌焉耆諸國悉附之唐書突厥傳咄陸入寇伊
州安西都護郭孝恪敗之咄陸以處月處蜜兵圍

天山而不克回鶻傳西突厥處羅可汗之殺鐵勒諸酋也其下往往相率叛去推契苾哥楞為可汗據貪汗山案博克達鄂拉在鎮西府西關展北鎮西府古伊州關展古高昌則博克達鄂拉當即高昌北七十里之貪汗山咄陸可汗自伊州敗還而圍天山宜在此地也北史魏書唐書俱作貪汗山惟隋書作貪汗疑傳寫之訛

西域釋地博克達山在鞏寧城即今迪化城東南二百餘里望之如在目前三峰峭拔入雲盛暑積雪不消山頂有潭周數十里山腰有潭周十餘里土人稱

為海子山南有俗所謂七箇達坂者即此山最高處路通吐魯番為軍臺孔道過嶺凡七上下計四十餘里按唐書西州交河縣北行經柳谷度金沙嶺至北庭都護城又按杜甫詩注自交河北行八十里至龍泉館北入谷百三十里經柳谷度瑩沙嶺百六十里經石會漢戍至北庭都護府今烏魯木齊為唐北庭都護故治吐魯番為西州故治以相距道里考之此達坂即所謂金沙嶺也今嶺畔有陡坡沙子細碎滑馬足金沙瑩沙當謂此

西陲紀略靈山在安樂城即今吐魯番城西北百里即博克

山脈三
達巴罕之陽其山最高大土人言此十萬羅漢削
髮涅槃處近山有高臺傍有僧寺寺下有石泉林
木入山行二十里至一硤硤有小土屋南登山坡
坡上有石屋中有小佛像五屋前有池池東有山
青黑色遠望披如毛髮土人言此十萬羅漢洗髮
處循破南行六七里登高崖崖下小山纍纍峰巒
秀麗羅列成行峰下白石成堆似玉輕脆不可把
握堆中有若人骨狀者堅如石文縷明晰顏色光
潤土人言此乃十萬羅漢靈骨也又東石崖下石
筍如人手足稍南至山坡坡石瑩潔如玉土人言

此乃辟支佛涅槃處也周行羣山約二十餘里五
色沙石火燄灼人四面峻壁石崖天巧奇絕不可
勝紀惟鳥獸絕無耳

三州輯略烏魯木齊東二百餘里北天山之間突
起三峯高插雲霄削如太華豐下而銳上四時積
雪不消上有大龍潭周數十里水清而甘深不可
測山之麓有小龍潭周十餘里水盈而流沛然莫
禦興雲致雨引水溉田數萬家惟此是賴博克達
者蒙古語神靈之謂故俗又名曰靈山將軍兆惠
會望祭於察汗柱爾地方乾隆己卯侍衛努三奏

言宜在巴爾哈達肇興祀典自是每歲內頒香帛
命都統等以太牢致祭於紅山之上其祭文由禮
部撰成頒發乾隆四十八年都統明亮由阜康南
山登山至大海子見水口爲大石阻截不能下洩
查勘估工約費二千金可以鑿石下注奏明准行
爲文致祭開石引流其年灌溉饒足次年五月潭
水不至再往履勘則潭水暴落渠口高出水面數
十尺又兼天寒無益麥苗經署都統圖具奏停止
仍令前都統明亮賠繳所費帑項焉

烏魯木齊雜記寒水石亦名雲母生於博克達山

之七達巴揭以糊窗澄明如鏡

靈山天池疏鑿水渠碑記阜康之陽靈山屏列峯
勢出沒雲霧中上有天池在焉俗傳此水爲蛟龍
窟宅雪罨冰封莫窮所自人欲探其勝者至山麓
輒爲風雨所阻余飭騎從自南山口取道而入谿
流曲折山徑紆迴林木交陰蔚然深秀穿巖越壑
盤旋於松雲翳鬱之間真不減蠶叢百折也再登
再憩漸就平岡聞水聲潺潺噴薄于斷巖之上者
小龍潭也潭水深碧其源弗長然雖流細力微亦
足以沾溉近郭從此越崇嶺數層始臻絕頂見神

池浩淼如天鏡浮空沃日蕩雲洵造物之奧區也
新疆圖說博克達山在阜康城南九十餘里

案博克達山準語神靈之謂故又曰靈山自迪
化望之似邇卽之實邈其山四周皆有冰雪環
之世稱雪海三峯從雪海中湧出嶄削如太華
而負絕依附凡人迹所能及如會仙臺柱天石
達摩崖福壽寺東嶽廟諸勝皆其支阜其去三
峯尙隔二日程窮冰莽雪好事者百計探之不
能達其上有龍湫黝然莫測其深其下建博嶽
廟以在府治東故又呼爲東嶽廟也所謂七箇

達坂者在其南紀昀烏魯木齊雜記稱根忒克
西北峻坂七層最爲險扼番人過者必下馬如
見所尊卽此又七十一新疆紀略云雪山在烏
魯木齊者爲博克達坂三峯孤峭冰雪晶瑩望
之如琉璃世界西陲紀略亦稱爲博克達巴罕
案博克達之山以神靈得名非達巴罕後人不
解其義妄增之耳七十一又云 上賜名福壽
之山今案迪化府城西有福壽山見諸三州輯
略不聞博克達有是稱一統志西域圖志新疆
識略諸 欽定書具在皆不言有 賜名福壽

之事豈以茲山有福壽寺故傳會其說歟七箇
達坂卽齊克達坂三州輯略云齊克達巴罕在
烏魯木齊城南二百三十里喀喇巴爾噶遜營
東十里山巔崎嶇道途礧礧七上七下四十餘
里俗名七箇達坂南通喀喇沙爾大道東通吐
魯番哈密安設軍臺宋供奉官王延德使高昌
所稱金嶺疑卽此非也金嶺在今孚遠之南辛
卯侍行記辨之詳矣貪汗山卽天山之切音字
三州輯略云貪汗山在吐魯番北夏有積雪山
陰卽烏魯木齊吐魯番鄉土志云北郊近城諸

山皆黃赤色無寸草三四月閒炎熱踰於閩粵
然更北遠山則盛夏積雪相距不百里而寒燠
迥殊此卽隋書所謂高昌赤石山北七十里之
貪汗山也蓋高昌北山皆爲天山又轉爲貪汗
山不必定指博克達言也

又東曰達斯達爾之山

案達斯達爾在吐魯番城東北南山之水流經
其下南趨爲沙河子折而西至沙河口入於沙
又東曰黑子爾坦之山無草木吉布庫水出焉北流入
於沙

吐魯番鄉土志黑子爾坦山在達斯達爾山東
五十里

又東曰凍度吉爾之山無草木固爾班托博楚克水出
焉北流入於沙

案凍度吉爾山在黑子爾坦山東奇臺永豐渠
水舊名固爾班托博楚克水

又東曰可洛之嶺有草焉名曰羊刺是生密

吐魯番鄉土志可洛達坂在凍度吉爾東五十里
又東曰克立之山木頭溝水出焉

吐魯番鄉土志可洛達坂又東二十里有山曰木

頭溝即克立山其溝水東經勝金台折而西流至
玉門口二堡三堡之田資灌溉焉

又東曰阿拉賴之嶺龍口渠水出焉北流分渠溉地

新疆圖說老奇臺龍口渠水在奇臺縣城東南一
百三十里其河三源均出阿拉賴達坂北流三十
里合為一水又流五十餘里分為數渠其正支至
老奇臺城分溉莊地

案阿拉賴一作阿拉爽在鄯善縣城西北坎托
海嶺西

又東曰坎托海之嶺齊克騰木水出焉東南流伏於草

湖

新疆圖說齊克騰木水在闢展城東九十里源出
祁連山坎托海達坂曲折東南流一百九十里至
齊克騰木驛東又三十里入於草湖

辛卯侍行記云回語齊克騰木得泉水也唐地志
羅護西百九十里至赤亭守捉王延德高昌記鬼
谷口西至澤田寺竊意赤亭澤田皆齊克騰之本
音也

案坎托海嶺在鄯善縣城北茂朋山西

又東曰茂朋之山有蛙焉吐冰爲雹名曰蜥蜴東吉爾

水出焉西北流入於地

新疆圖說茂朋山在吐魯番城東北二百四十里
東吉爾水在奇臺縣城東一百三十里源出茂朋
山西北流五十里又北流三十餘里至東吉爾莊
分灌地畝

奇臺鄉土志平定山卽茂朋山在舊縣城東南一
百二十里

案茂朋山在鄯善縣城東北薩拉海山西

又東曰薩拉海之山白楊河水出焉西北流伏於山溝
新疆圖說上下白楊河在奇臺縣城東二百四十

里源出祁連山薩拉海山溝北流二十餘里入奇
臺境西北流五十里爲白楊河又二十里伏於山
溝

案薩拉海以上九山統名祁連山山海經云天
山西二百九十里曰泐山西行百里至於翼望
之山郭璞注翼望或作土翠山天山卽漢貳師
擊右賢王處天山當指今鎮西哈密境內天山
而言其所謂泐山翼望山當卽今闢展北一帶
之山如上諸山是也

霍同察海嶺

吐魯番鄉土志霍同察海達坂在廳城西界層巒
疊嶂冰雪至夏不消一水出其中東北流入於沙
納林奇喇山

西域圖志納林奇喇塔克在蘇巴什塔克西五十
里其東谷口在托克三西南九十里山峯最高處
爲額爾坤達巴自谷口迤西南齒萃如屏

案納林奇喇當卽舊圖之瑚洛海達坂一帶之
山其北則烏斯圖果勒及作洛滿苔諸水所出
吐魯番鄉土志云其山險峻荒寒人迹罕到卽
此山也西與博羅圖山相接

蘇巴什山

西域圖志蘇巴什塔克在闐展南自博羅圖納林奇喇諸塔克迤邐東屬經闐展南境踰東界而止爲闐展南屏過此而東南皆沙磧矣其北谷口在托克三西南五十里谷內有兩大石入谷行十里微有水草蓋古車師通焉耆道也唐書地理志自西州西南有南平安昌兩城百二十里至天山西南入谷經礪石磧按唐西州今爲闐展蘇巴什塔克在闐展西南一百七十里唐地理志稱西州西南入谷者當指蘇巴什山谷而言谷內兩大石意

卽所謂礪石也又按自托克三西出有二道其一出伊拉里克由阿拉癸鄂拉入谷口經裕勒都斯以抵伊犁其一經納林奇喇山口踰博羅圖谷口迤南以抵楚輝其一西南入蘇巴什谷口踰庫木什阿克瑪塔克亦抵楚輝

莎車行記十七日蘇巴什台宿入哈喇沙爾界亂山之中僅有軍台一所台對一山石骨沙膚高數十仞勢極陡絕回人履沙而登至絕巘挺身直下爭先鬪捷以爲戲疾如飛鳥一瞥到地十八日阿哈爾卜拉克宿軍台面山如蘇巴什山純石無沙

山脈三
四
高峻過之台東北二十里名蘇巴什溝怪石崢嶸
纍纍塞路

案蘇巴什驛距吐魯番城二百一十里驛卽因
山得名西南行七十里至阿哈爾布拉溝左右
石壁陡峭高插雲霄中劃一道僅容雙輪逶迤
百數十里石徑犖确車如簸箕每當盛夏山水
暴發狀如奔馬呼吸間有波臣之歎行者視爲
畏途丁未之秋命遊擊張鴻疇鑿平石磴其阻
路大石用火藥炸除不似從前之狹逼矣圖志
所謂兩大石者當卽指此

都魯嶺

西域圖志都魯達巴在交河城西北一百二十里
其脈從迪化州東之托克喇鄂拉分支迤邐而東
屬於金嶺東西百里西有圓澤周數里名鄂蘭淖
爾其支流出於嶺谷間乃雅木什以西諸城屏障
也按宋王延德高昌行記歷交河州凡六日至金
嶺口又兩日至漢家砦以今形勢證之都魯達巴
與漢家砦爲近

案都魯嶺當卽今之伊拉里克山其鄂蘭淖爾
卽依拉湖之轉音也山之西南有水東北流瀦

山脈三
爲此湖交河城在今吐魯番廳城西二十三里
之雅爾河伊拉湖在城西一百五十里正與圖
志所謂都魯嶺在交河城西北一百二十里者
里數相合伊拉湖壤地極廣興修水利者多注
意於此

托克遜山

吐魯番鄉土志城西百二十里曰托克遜山卽夾
爾蓋斯山有河出迪化東南流經托克遜城東而
南其西一水自托克遜城西來會又東南瀦爲覺
洛浣東南流入於沙

黑頭山

吐魯番鄉土志城西二十里曰黑頭山雅木什及
布幹二水出其下南流至雅木什及城西之督干
湖灌注涼州西甯等工莊地

覺洛塔哈山

新疆圖說覺洛塔哈山在吐魯番城南二百四十
里

克子里山產煤

新疆圖說克子里山在吐魯番城南二百六十里
庫什嶺無草木

案庫什嶺在克子里山南

巴什若洛滾山

案巴什若洛滾山在庫什嶺西南

庫什爾嶺無草木

案庫什爾嶺在巴什若洛滾山西南

庫木什嶺

案庫木什嶺在庫什爾嶺西南

土甲甫哈朗山

案土甲甫哈朗山在庫木什嶺西南

哈拉可山

新疆圖說哈拉可山在吐魯番城南六百八十里

案哈拉可山在土甲甫哈朗山北

卡卡蘇嶺

辛卯侍行記吐魯番廳城東南一百三十里魯克

沁折南四十里沙白特坎爾西南行三十餘里入

覺洛塔克山峽七十里克子里山產煤一名伊格

爾達坂回語馬鞍曰伊格爾八十里阿習布拉克

言水苦也西南過庫什爾達坂一百七十里烏宗

布拉克彌望堅鹵其白如雪中有一水鹹不可飲

回語長流曰烏宗西南入孔木達坂

即庫木什嶺

回語沙

曰孔木又曰渾六十里帕沙布拉克井水鹹折西
八十里生額爾或名五戶地有池及樹纏回一家
地三十畝半耕半牧六十里阿子杆布拉克轉西
踰卡卡蘇達坂東西連山又名庫圖洛克塔克猶
言無水草荒山也六十里托呼喇布拉克以上七
程須馱負淡水冬則熬冰雪以飲五十里出峽營
盤海子周約三十里海西十餘里有廢壘西南平
沙寬廣相傳此處本在澤中爲浣溪河淤沙所堙
疑古時此海與蒲昌海合也西南四十里浣溪河
回語曰共奇達里雅共奇古墓也達里雅河也漢

人訛其音曰浣溪河或曰孔雀河實卽喀喇沙爾
之海都河也

金嶺魯克沁水洋海水皆出其南麓

西域圖志金嶺在闐展北境嶺脈係天山分支自
迪化州東境之托克喇鄂拉東出爲都魯達巴經
吐爾番城北東至闐展四百餘里凡闐展所屬諸
城皆以此山爲屏障亦皆藉此山之水導之繞城
以溉田園隋書高昌傳北有赤石山山北七十里
有貪汙山夏有積雪唐書地理志西州交河郡開
元中曰金山都督府宋史外國傳有水源出金嶺

導之周圍國城以溉田園作水磴宋王延德高昌
 行紀歷交河州凡六日至金嶺口寶貨所出又兩
 日至漢家砦又五日上金嶺嶺上有龍堂刻石記
 云小雪山也嶺上有積雪行人皆服毛罽度嶺一
 日至北庭按漢書西域傳卑陸國治天山東乾當
 國劉奉世曰卑陸後國治番渠類谷郁立師國治內國字當作谷
 咄谷西且彌國治天山東于大谷東且彌國治天
 山東兌虛谷劫國治天山東丹渠谷狐胡國治車
 師柳谷考諸國舊疆即今闢展所屬之蘇巴什森
 尼木汗和羅諸境居今嶺之北者則所謂乾當番

渠類內咄于大兌虛丹渠柳谷應即今金嶺以北
 博克達鄂拉東南一帶山谷而乾當于大兌虛丹
 渠云在天山東當與博克達鄂拉為尤近唐書薛
 延陀傳載契苾哥楞為易勿真莫賀可汗據貪汗
 山以隋書赤石山北七十里有貪汗汗為汗字之訛山之文
 証之則貪汗山當即今之博克達鄂拉而其南七
 十里之赤石山當即唐地理志所謂金山宋史所
 謂金嶺其名至今不易者但考唐書稱自交河縣
 北八十里有龍泉館又北入谷百三十里經柳谷
 度金沙嶺則自縣北二百一十里至金沙嶺也延

德行紀稱自交河州六日至金嶺口又兩日至漢家砦又五日上金嶺則自交河城十三日行至金嶺也疑當時自都魯達巴至托克喇鄂拉一帶總名金嶺今則專屬闢展諸城之北山矣

案陶葆廉云纂修西域圖志諸官以連木齊爲漢車師後城長國以森尼木爲漢卑陸國其東北一百里汗和羅爲卑陸後國其西北七十里布拉克爲劫國按漢書後城長在郁立師國之東郁立師北與匈奴接則後城長亦北接匈奴今連木齊之北爲車師後庭是後城長不在

此也漢書二卑陸與劫國毘連卑陸後國北接匈奴南接車師則當在車師之北若森尼木汗和羅等地皆在車師東矣吐魯番漢車師前國

史記作姑師治交河城今廳城西十三里之招哈和屯一名雅爾河

狐胡國地以漢書兩國

去長安里數相較則狐胡在交河西五十里以去焉耆里數相較則狐胡在交河西六十五里漢書云狐胡治車師柳谷新唐地志交河縣北八十里龍泉館又北百三十里柳谷蓋今廳城西北迪化東南白楊河等處也今案古之金嶺當在博克達山迤東爲濟木薩東南一帶之山

今則以吐魯番近城諸山為金嶺矣西域圖志

云魯克察克即魯克沁水洋赫即今之洋海水皆發源金嶺南

麓此蓋勝金台連木齊即連木沁蘇巴什等處之山統

名金嶺由連木齊西行三十二里至蘇巴什非城

西之蘇巴什又三十八里至勝金口又七十五里至吐

魯番廳城吐魯番鄉土志云勝金台山起自松

山南趨噶順沙磧案勝金台本作森尼木或稱

僧吉木回語潮溼也今訛為勝金台勝金台驛

舍今移西二十一里之呼愛克斯漢人呼為勝

金口陶葆廉云登降阨陘左巖右澗流水淙淙

隔岸土屋二三小樹繞之出塞所經惟此處有

幽景而車行較險佳境亦危境也

已上吐魯番境內支山

柯柯雅山厥產煤有水焉出峪入於河

鄯善鄉土志柯柯雅山在縣城西北九十里產煤

山內有水流出口浸入沙內

辛卯侍行記云闢展南皆大戈壁其北九十里柯

柯雅爾又北入山經夾皮泉回回溝通木壘河可

騎行

紅山

鄯善鄉土志紅山子在縣城北二十餘里

案紅山卽隋書所謂高昌北之赤石山也明史
火州其地多山青紅若火今吐魯番東北有火
山數處恒起煙霧隱現無定蓋煤硫諸礦火也

已上鄯善境內支山

托克喇嶺

西域圖志托克喇鄂拉在博克達鄂拉西南一百
六十里迪化州東南五十里山脈自哲爾格斯鄂
拉東行至此停蓄折而北卽今迪化州東障也
一統志托克喇山在迪化州東五十里漢書載蒲

類國治疏榆谷卽其地

案迪化州東南五十里當在出羊腸子溝入芟
芟槽山口方位俗呼爲塔克山此天山之分支
非正榦也徧考迪化東南五十里內外並無正
榦之山圖志非也辛卯侍行記云芟芟槽南北
皆山無草木無民居十里升兩坡迤西陂陀迂
曲頑石撼輪地名羊腸溝十二里下坡

雅瑪里克山

西域圖志雅瑪里克鄂拉在昌吉郭勒西羅克倫
郭勒東昌吉縣治西南五十里當孔道南

新疆圖說雅瑪里克在迪化城西南二十五里

案新疆舊圖雅瑪里克在頭屯河即昌吉河東蓋屬

迪化之山此山為朱勒都斯之分支蜿蜒昌迪

境內統稱為雅瑪里克故迪化城西之福壽山

訊鮮錄亦謂之雅瑪里克也

福壽山其上多蛇虺

三州輯略福壽山在鞏寧城南里許自紅山平斷處平行二里其南岡巒忽起蜿蜒西行直赴瑪納斯大河層崖疊嶂其陽則珠勒都斯山塲也其北復向西南接庫爾喀喇烏蘇南山西至晶河直抵

伊犁皆天山也每見雲霧迷漫夏必雨冬必雪俗稱靈應山西向建龍王廟一座山腰開渠宛轉如帶疏洩消融之雪水繞鞏寧城西南北灌民屯地畝

西域釋地福壽山在城南一里許按舊滿城言本名靈應

山每山上起雲霧必雨雪後定今名建塔其上

案訊鮮錄云福壽山即雅瑪里克山由朱勒都

斯山分支東趨二百餘里府城西里許屹然而

止案此山俗謂之妖魔山妖魔者雅瑪之轉音

蓋雅瑪里克山直趨東北故通稱也七十一風

土記謂博克達爲福壽山非

紅山

三州輯略紅山在鞏甯城東南三里山高里許周寬數里峭壁懸崖形如蟾蜍昂首南面陡坡直上山巔建玉皇廟一座旁堆鄂博東南爲望祀博克達山之所都統索諾木策凌題額曰上方山每歲四月十五日居民商戶車馬雲屯雜技百工靡不聚集爲塞上一勝會也南北兩路均稱烏魯木齊爲紅廟子本此

新疆圖說北極山今名紅山嘴在迪化城西北五里

案紅山在舊滿城東迪化城西北西南與福壽山僅隔一路乾隆三十三年八月十五夜昌吉流人殺屯官爲變次日報至時兵皆散屯於外城中兵僅一百四十七人大學士溫福急率之以行至紅山口守備劉德叩馬而諫曰此去昌吉皆平原無險可扼且賊得城必不株守而南界天山北界葦湖無路可竄其勢當卽來莫如駐兵於此借陡崖遮蔽賊不知多寡俟其至扼險下擊賊可擒也從之賊至衆鎗齊發馬皆驚逸譟而乘之賊遂殲蓋亦迪化一要隘矣

智珠山

三州輯略福壽山在鞏甯城東南平地孤起一峯漫坡高里許上建八蜡神廟文昌殿殿之東南繚以周廊開窗遠眺為文人嘯詠勝境

案智珠山俗謂之蜘蛛山在迪化西北紅山之

西

通古斯巴什山

西域圖志通古斯巴什鄂拉在巴爾巴什鄂拉西二十里迪化州境宋王延德高昌行記北庭北山中出礪砂山中常有煙氣湧起無雲霧至夕光燄

若炬火照見禽鼠皆赤采者著木底鞣取之皮者

即焦下有穴生青泥出穴外即變為砂石土人即

以治皮案迪化州為唐北庭亦作北庭宋時山北並隸

高昌而北廷之稱不改則所謂北廷北山當屬今

迪化州即烏魯木齊北境之山考其方位宜與巴

爾巴什通古斯巴什諸山相近又隋書西域傳載

阿羯山應即唐書龜茲國北之阿羯田山史亦稱

其有煙火出礪砂疑延德所記有不定屬於烏魯

木齊北境者或自今之烏魯木齊以西迄於阿克

蘇北山皆屬天山正榦地氣積厚當時產吐煙燄

有大畧相同者是以諸書紀載率多近似不妨兩存之以備考證

案迪化西北頭屯河之山產石煤質最佳與甘肅鎮番靈州諸煤無異日夜常有煙火當卽王延德所稱之山

巴爾巴什山

西域圖志巴爾巴什鄂拉在迪化州城西北三十里

案迪化城西北二三十里內之山產炭俗呼爲西山窑省垣所需之炭皆此山所出也當卽巴

爾巴什山

巴上迪化境內支山

額得墨克嶺察罕烏蘇納里特之水出焉均北流入於地

西域圖志額得墨克達巴在托來達巴西七百餘里闢展北爲博克達迤東之支峯察罕烏蘇納里特布拉克發源於其北麓

案新疆圖說云黃山河亦名察罕烏蘇水在阜康城東南八十里源出博克達山北流分渠灌地大龍口水亦名那拉特水在阜康城東南一

百八十五里源出博克達山北流亦分渠入地
那拉持即納里特也此山仍係博克達山特其
支峯耳

黃山產煤炭有水焉分渠入於地

新疆圖說黃山炭窑在阜康城東南一百五十里

小黃山炭窑在阜康城東南八十里

阜康鄉土志大黃山小黃山皆博克達之前山大

黃在縣治南少東小黃在東南

案察罕烏蘇水今名黃山河據此則大黃山當
與額得墨克為一山

已上阜康境內支山

千佛洞山

三州輯略千佛洞山在濟木薩城西南山內距城
十餘里入山約行數里重岩疊嶂高下不等樹木
叢茂並未見有洞口傳聞自乾隆三十五六年間
有濟木薩城內賣菜民人患眼疾逾年不痊將至
失明賴熟悉山徑拄杖揀柴度日一日入山眼疾
遽發痛欲覓死將縊山樹下忽聞人言山下水洗
眼可痊如是者三乃匍匐下坡聽有水聲祝曰此
必神示如果洗愈誓為僧坐溪邊掬水洗之痛立

山脈三
止洗一日夜兩目卽能視物登山坡小坐忽見坡
土坍塌露白灰墻壁用手刨之有門洞跡因出山
告村人攜帶鋤鑿開洞門取炬照之洞形如半
月見一卧佛身長丈六金面跣足衣服顏色如新
又有銅佛大小不計數自尺餘至三五寸不等其
人感泣卽日落髮募錢建廟都統索諾木策凌貢
洞中銅佛九尊考宋供奉官王延德使高昌錄云
時四月師子王避暑於北庭邀延德凡六日至北
庭憇高台寺又明日引延德遍遊境內佛寺有曰
應運泰寧之寺貞觀十四年造此洞蓋亦唐時高

昌舊蹟也

西域水道記保惠城南十五里入南山山麓有千
佛洞紺宇壯麗山南通吐魯番宋王延德使高昌
記云自前庭經雪山龍堂殆由斯路

案千佛洞山在孚遠縣城西南十餘里小龍口

水經其東

無量山

孚遠鄉土志城西七十里三台南面有山名無量
山山中有無量佛廟故名其脈來自博克達山時
起時伏走入縣境突然高矗凌雲其下衆山羅列

山脈三
脈分數支遠者三十餘里近者至三台官道而止
照壁山其樹多松榆

孚遠鄉志縣城南十餘里照壁山脈由吐魯番
冰山絡繹而來勢若列屏松榆夾道蓋其分支也

紅山

孚遠鄉志紅山亦吐魯番冰山之分支距城東
南十餘里

北沙山

孚遠鄉志縣治北界科布多山色赭黃童禿無
草木

山脈三
已上孚遠境內支山

松山

奇臺鄉志松山在本境舊治之南一百餘里爲
天山之分支自西南更格爾迤西入境蜿蜒至東
南穆家地溝迤東出境綿亙四五百里支峯錯峙
隨地異名土人悉呼爲南山其間水源共一十餘
處均向北流

西域水道記保惠城東北九十里爲古城其南山
曰松山城距山百里

哈布山

山脈三

三
陶

廬

西域圖志哈布塔克在必濟鄂拉西北四圍皆沙
磧東南距鎮西府城四百里自此西北行與天山
北路之拜塔克相接爲準噶爾舊疆交界處山北
六十里即布拉千郭勒

新疆圖說哈布塔克在奇臺城東北四百一十里
奇臺鄉土志縣城東北至哈布塔克四百餘里與
鎮西廳屬之羊圈灣及札哈沁接壤其路自距城
一百八十里之木壘河驛東北行八十里至黑山
頭又東北一百里至闢泉又八十里紅沙泉又九
十里花兒刺

自花兒刺以下
皆鎮西廳屬地

又經戈壁八十里至紙房

又折而西北至高泉亦名紅柳溝從此入山溝西
行四十里至條湖又四十里葦子峽又四十里頭
水從此出山溝北行經戈壁八十里至龍膊子溝
即哈布塔克口入溝行五十里至羊圈灣

案嘉慶二十年松筠議於都蘭哈喇山採鉛嗣
札哈沁獻其鉛地長三百餘里廣六七十里東
至大哈布山四十里西至小哈布山百七十里
此蓋小哈布山也

拜山

西域圖志拜塔克在鎮西府西北境之哈布塔克

西一百十五里山脈自鎮西府北山東行至塔勒
納沁之北折而西北行爲阿濟鄂拉又西行爲哈
布塔克又西行至此盤迴千有餘里蓋天山分支
也烏里雅蘇台布爾噶蘇台烏爾圖諸布拉克皆
出其南麓按後漢書陽嘉三年夏車師後部司馬
率加特奴等千五百人掩擊北匈奴于閼吾陸谷
四年北匈奴呼衍王侵後部帝以車師六國接近
令敦煌太守發諸國兵及玉門關侯伊吾司馬合
六千三百騎救之掩擊于勒山今考車師前後部
在博克達鄂拉東天山南北漢時呼衍王近與相

接應在哈密西北博克達鄂拉東北一帶是以裴
岑誅呼衍王碑卽在哈密庫舍圖達巴而後漢書
所謂閼吾陸谷與勒山者亦當在哈密西北博克
達鄂拉東北一帶與今之哈布塔克拜塔克哈喇
莽奈鄂拉爲相近也特其地難確指爲何山附見
於此

新疆圖說拜達克在奇臺城北三百一十里
奇臺鄉土志縣城北至拜達克三百里自孚遠驛
起出北門東北行三十里西地又東北行十五里
東地又四十里漢溝此處設有卡倫又北行七十里北芟芟

湖又九十里老君廟此處舊有煤窰又六十里至拜達克北

界科布多屬札哈沁旗南路通哈喇莽奈山案俄人採得捷走古城之路夏由布倫托海東出哈喇莽奈冬由布倫托海西以達古城然則後路之防宜早為未雨綢繆者矣

已上奇臺境內支山

又東曰察罕托羅海之山

西域圖志察罕托羅海猶云白峯也在托來達巴

西

案哈密西北七箇井頭水諸驛之山即漢書武

帝紀之天山後漢明帝紀稱白山章懷注作折

羅漢竇固傳注訛作祁縣羅漫山折羅漢即托

羅海之變音隋突厥傳稱時羅漫唐地理志曰

折羅漫山薛仁貴傳征鐵勒發三矢殺三人軍

中歌曰將軍三箭定天山壯士長歌入漢關宋

史外國傳稱雪山此曰白峯蓋亦白山之義盛

夏有雪故名時羅漫析羅漫又折羅漢之訛字

也今出關赴迪化者多由此路

又東曰托來之嶺托來泉水出焉

西域圖志托來達巴在烏可克達巴西三十五里

托來布拉克出其西麓東北距鎮西府城今改一廳

百九十五里山脈自西七百餘里之博克達鄂拉

分支東北行至此當鎮西府西南境

案蒙語托來兔也卽今之陶賴由七箇井東行

一百里陶賴井又東六十里上肋巴泉七十里

蘇吉九十里鎮西廳新疆圖說云五羣馬廠在

陶賴達坂地方距城西南二百餘里

又東曰烏可克之嶺

西域圖志烏可克達巴在和洛圖達巴西五十里

當孔道東北距鎮西府城一百五十里山脈自西

三十五里之托來達巴東行至此山徑稍夷可通

南北俗名西打坂

案蒙古語烏可克小櫃也下嶺入兩崖間左右

偪仄境若深藏故名新疆舊圖列烏可克嶺於

陶賴井之西大誤康熙五十四年肅州總兵路

振聲奏沙棗泉西北九十里有山名無克克嶺

其下卽巴爾庫爾山上遠瞭甚明臣移營於此

卽此嶺也陶保廉謂卽瞭墩非也

又東曰和洛圖之嶺

西域圖志和洛圖達巴在阿勒札噶勒鄂拉西五

十里蒐濟西南當孔道東北距鎮西府城一百里
山脈自西五十里之烏可克達巴東行至此稍折
而北

案蒙語和洛圖遠也蒐濟卽今之蘇吉驛驛距
廳城九十里和洛圖山蓋當今哈木爾嶺之地
鎮西東龍口水出其北麓流二十里合西龍口
水至蘇吉莊分灌地畝哈密頭道溝水二道溝
水均出其南麓南流三十餘里入於沙

又東曰庫舍圖之嶺南通哈密東北瞰喀爾喀西達關
展古城其樹多古松煎膏食之令人長壽其花多雪蓮

其草多一枝蒿招摩多之河經其下西流入於巴爾庫
勒淖爾有唐碑焉觸之則大風雪其上多木客或曰雲
陽之精

西域圖志庫舍圖達巴在塔什達巴西奎蘇東南
六十里西北距鎮西府城一百五十里山脈自烏
可克達巴東行三百里至此卽巴爾庫勒南山山
徑稍夷爲南北通行之道俗名東打坂與西打坂
東西相望度嶺北行十里爲招摩多漢語名
松樹塘自哈密
東北行五十里爲南山口卽山南入嶺處上有唐
左屯衛將軍姜行本碑雍正十一年將軍查郎阿

開南山運道經數十折達於山頂唐書姜行本傳
高昌之役爲行軍副總管出伊州距柳谷百里依
山造攻械增損舊法械益精其處有漢班超紀功
碑行本磨去更刊頌陳國威靈遂與侯君集進平
高昌按庫舍圖達巴譯言碑嶺姜碑現存是嶺以
碑名無疑也舊一統志謂卽侯君集平高昌後紀
功碑仿竇憲勒燕然意不在高昌國都然考唐書
太宗紀貞觀十三年十二月壬申侯君集爲交河
道行軍大總管伐高昌十四年八月癸酉克高昌
侯君集傳高昌平君集刻石紀功還據此則君集

刻石紀功當在八月癸酉克高昌後今碑嶺之碑
石刻六月辛卯可知其非一碑且文中但著出師
之盛未陳凱捷之功更以姜行本傳磨班碑更刊
頌之文証之所謂依山造械者正與碑文伐木殫
林公輸比妙諸語相合則此碑之建應在伊州造
械時進平高昌以前是侯君集平高昌紀功當別
有刻石未可云卽屬此碑而當時紀功之碑亦未
必不立於高昌國都也

一統志碑嶺在哈密城北往巴里坤軍營必由此
土人名闊石圖謂碑嶺也上有唐碑文多剝落尚

存侯君集領十四萬軍等字

西域釋地松樹塘嶺北面最陡峻盤旋行三十餘里始至其巔上建關帝廟廟西數十步小峯頂有唐貞觀十四年碑大書大唐左屯衛將軍姜行本勒石之紀文十五字於碑額拓頗不易近有作僞者文字舛劣可歎按紀文達筆記云侯君集平高昌碑在嘉峪關外闕石圖嶺脊守將砌以磚石不使人讀云讀之則風雪立至屢試不爽然則此本乃後人轉摹別刻者矣又有漢永和二年隸書碑此碑舊在山巔恐風雨剝蝕移建巴里坤北門外

關帝廟中

西陲紀略巴里坤南山老松高數十尋大可百圍蓋數千載未見斧斤物也其皮之厚者尺許向有攜以入內地者特以罕覲示奇然未知主治置之茶肆中肆者雜入茶內飾色而售隣媪弱病久不愈日買茶而飲焉未幾病如失詢之肆者具以實告於是知松皮之爲功懋矣帥府令人就山斫而煉爲膏凡皮一車可得膏一盞費工力一晝夜需薪無算醫院劉裕鐸邵正文參定主治十二症刊而布之大要皆治血症而於婦人爲尤宜然性最

熱用可數分耳

西域水道記自奇臺縣東南行三十餘里入山山中東行三百二十里為色畢溝又東行六十餘里為噶順溝又東行百五十餘里為肋巴泉山勢乃開南北分趨二百六十餘里而復合迴抱周匝如環城墉中為平川廣輪八百餘里其間諸水潴為巴爾庫勒淖爾回語謂有為巴爾謂池為庫勒始因水以名地曰巴爾庫勒今之巴里坤即音之轉繼因地以命水曰巴爾庫勒淖爾淖爾當川西偏其東南隅山曰庫舍圖嶺山脈自烏可克嶺東行三百里至此

即巴爾庫勒南山山巔有關壯繆祠祠東三十餘步有石室庋唐姜行本碑土人言碑至神異相戒不得搨搨即致大風雪斷行人余庚辰二月經祠下親搨一通祠東二里為菩薩溝又東南十三里為羊圈溝其地置營塘自此層折而下東南行三十五里為煥彩溝煥彩溝三字立石路側理藩院筆帖式正書填以朱其石亦漢碑石之陰隸書四行首行曰惟漢永和五年六月十五日下缺二行曰臣雲中沙南侯餘皆不可辨識煥彩溝又五里為南山口營塘自羊圈溝以東水南流成河由煥彩

山脈三
溝經營塘之西出山又南行二十餘里遇沙而伏
羊圈溝以西衆山出泉會而成河北流經庫舍圖
嶺下由柵門之東出山是爲招摩多河柵門者斥
堠所也自松樹塘並山東南行十四里南入山口
一里有木城中置門如關幾察非常謂之柵門元
耶律楚材以丁亥九月過夏國新安縣詩云昔年
今日渡松關注西域陰山有松關見淇蔡居士集疑卽此柵
門也又柵門東行渡招摩多河乃層折而上五里
至二層台又旋折歷磴道二十四級雍正十一年
大將軍查郎阿命兵部員外郎阿炳安所鑿衛以

朱欄映帶流水青松白雪自然明麗磴道盡乃至
關壯繆祠旁祠當柵門正南舉目可見盤折而上
十有五里在暑亦雪尤艱行旅招摩多河卽穿柵
門東墉出西北流十餘里經石佛寺南石佛者掘
地所得於此置寺土人以爲唐時造像河又西流
數里經沙山南有松樹塘水入之松樹塘卽庫舍
圖嶺口之山萬松叢立四時鬱青熊懋獎西行記略云松有二種一種紅松一種白松四季長青紅松換葉至五月初始發新枝於此置營塘洪先輩亮吉經此作
萬松歌松皮可煎爲膏山中雪深處生花曰雪蓮
又產草曰一枝蒿營塘南半里有泉發山半亂石

山脈三
中驀坡下經塘西數十步塘之東二里亦有泉發
山半又東六里有水發山澗皆北流匯爲松樹塘
水又西北流入於招摩多河河又西流入淖爾
東歸日記二十六日至松樹塘一路近山行走愈
近愈妙雖係山陰而山頂雪厚日光照耀半山以
下松樹聳翠千重萬疊此山直接伊犁天山一脈
石骨嶙峋草綠如茵流泉百道野花爛發異香襲
人極壯游之樂事對面山脚下有沙坡一段獨無
青草橫長數十里相傳唐時營盤爲沙所壓至今
嘗聞金鼓聲二十里由山脚行十餘里折曲盤旋

而至山頂關帝廟三層深巖幽邃旁有小屋庇唐
貞觀十九年姜行本紀功碑看則風雪立至余丙
戌九月杪過此曾進屋內一看碑約四五尺高字
字清楚不甚奇異出屋頃刻果起大風雪花飄飄
旋即放晴今年二月望前伊犁領隊大臣某過此
必欲看碑廟祝跪求不准強進屋內未及看完大
風忽起揚沙走石某驅馬下山七十里至山下館
店大雪四日夜深者丈餘馬廠官馬壓死者無數
行路不通文書隔絕數日吁真不可解也旁有福
郡王碑一座乾隆年間立徐星伯太史松有題關

聖廟一聯又巴里坤有天山鼉城岳臺岳大將軍駐兵山上

山鏡潭黑溝新宮諸景中惟岳台最雄傑前有八

陣奇門兩旁能容萬馬黑溝去城三十里路難行

一入山內豁然開朗蒼崖絕壁樹木千章飛泉瀑

布琪花瑤草別有洞天惟高處不勝寒風雪無常

鼉城即海市蜃樓天陰則現亦奇觀也龍王廟獨

有柳樹他處絕無故有煙林之勝

新疆圖說天山古名祁連山在哈密城北一百三十里

案庫舍圖洪圖作闊什特將軍查朗阿開此山

運道在雍正十一年癸丑漢唐行軍多在此山

左右國朝兵征西域亦以此為進取之基所謂

中權制勝者也

又東曰塔什之嶺鞭桿之河出焉西南流注於賽巴什

湖

西域圖志塔什達巴在必柳鄂拉西北三十里呼

濟爾台之東南鞭桿河出其南麓西南流通賽巴

什

案呼濟爾台今作胡吉爾太在哈密城北一百

七十里賽巴什新疆圖說作蔡巴什鞭桿河作

塔平河此與塔勒納沁城北之塔什嶺東西通
一山也

又東南曰必柳之山必柳之泉出焉其獸多麋

西域圖志必柳鄂拉在雅爾瑪罕鄂拉西南一百
里必柳布拉克出其南麓

一統志必柳山在鎮西府城東南二百里必柳泉
出其南麓

案必柳山在哈密乞干淖爾之北

又東曰大羊頭之山

新疆圖說大羊頭山在哈密城東北一百九十里

又東北曰雅爾瑪罕之山

西域圖志雅爾瑪罕鄂拉在塔勒納沁鄂拉西一
百五十里圖古里克之南西北距鎮西府城三百
里山脈自庫舍圖達巴東行二百里至此峯巒峻
拔

案新疆圖說土古魯卡倫在哈密城東北三百
三十里卡南阿里鐵洛可山在哈密城東三百
二十里當卽此山之異譯也土古魯水二源均
出阿里鐵洛可山北流一百八十里至鬧毛湖
分灌營地土古魯卽圖古里克也

又東曰塔勒納沁之山其北四十里曰雪蓮坪

西域圖志塔勒納沁鄂拉在塔勒納沁城南星星
峽北二百五十里西南距哈密城四百五十里塔
勒納沁郭勒分出於其南北麓爲二源其北四十
里有雪蓮坪相傳雪蓮產此者佳山脈自葱嶺分
支迤東而來至此爲天山東盡處由是歷嶂西行
入鎮西府界峻嶺層沓亦屬天山之尾閭宋王延
德高昌行記載自夏州歷樓于山都督山唐回鶻
之地又經馬驢山望鄉嶺嶺上石龕有李陵題字
處然後歷伊州伊州爲今哈密則樓于都督諸山

當在今哈密東南境上

案新疆圖說載塔勒納沁城東西皆塔什山塔
什山亦名阿克塔什坦又名庫巴申圖嶺在哈
密城東其所出之水曰塔勒納沁河曰太陽溝
水曰尖山子水曰什阿拉水曰大天生圈水曰
頭道溝水曰照壁溝水曰烏拉台水庫巴申圖
所出之水曰乞干淖爾曰黑其瑪克水曰哈密
河天山自葱嶺分支出疏勒之北東經烏什溫
宿伊犁庫車焉耆迪化吐魯番鎮西哈密綿互
數千餘里至塔勒納沁而止故卽其地名塔勒

納沁山其實皆塔什山也三州輯略云天山行
至巴里坤之東名鹽池山即塔勒納沁山截然而止伏入
地中千餘里至嘉峪關外沙州之東突兀起頂
東行名祁連山案祁連山實自南山一支分脈
伏地再起之說不敢信爲必然西域圖志謂天
山自巴里坤分脈北行而西北至阿爾台山有
龍象回顧之勢考巴里坤西北山勢斷續起伏
沙磧之中實不能結此大山魏源北榦考謂阿
爾台山之脈由伊犁博羅塔河之西遶額爾齊
斯河宰桑泊之東北而起阿爾台山其說近是

但就里數長短以阿爾台山爲天山正榦哈密
巴里坤爲分榦則一家之私說也

合塔乎可拉山有水焉南流伏於地

新疆圖說合塔乎可拉山在哈密城西北一百三
十里八道溝白楊溝水出其南麓均南流三十里
伏於戈壁

而洛可洛山有水焉南流伏於地

新疆圖說而洛可洛山在哈密城西北一百三十
里七道溝水出於此山南流三十里伏於戈壁

沙克拉山

新疆圖說沙克拉山在哈密城西北一百五十里
截嶺

案截嶺在哈密城西北沙克拉山之西三道溝
四道溝之水出其南麓截達坂卡倫在城北三
百里

空多洛山

新疆圖說空多洛山在哈密城東四百八十里
案空多洛山在塔勒納沁城東北其東即鹹水
峽其西即三箇達坂蓋亦塔什嶺之尾間也東
與喀爾喀札薩克圖汗界

阿特斯山

新疆圖說阿特斯山在哈密城東北六百里與喀
爾喀札薩克連界

坤豈圖山

新疆圖說坤豈圖山在哈密城東北二百八十里
阿克桐木山

新疆圖說阿克桐木山在哈密城東北二百三十
里

于里格山鹽池水出焉

新疆圖說于里格山在哈密城東北二百餘里鹽

山脈三
池水源出此山東南流三十餘里經達子溝入錫喇淖爾

星星峽是生星星石有馬馬往來山中名曰神馬

西域圖志星星峽在哈密東南四百九十里南距安西州屬之馬蓮井七十里迤邐東北行四百五十里爲西黃蘆岡峽在沙磧中接安西州境

荷戈紀程星星峽間於山峽陰氣森然居民僅九家聞峽之西有魑魅自建關聖廟邪魔漸遁過客皆於廟中留香火資有捨兩馬於廟者遂爲神馬一往各山自覓食朔望一至廟一每日自赴村店

有過客餒馬卽與同槽食飽且自去今往來僕御咸知之見馬來食遂喜以爲神佑云

案星星峽在哈密城東南五百二十里爲甘肅新疆分界之處峽路崎嶇雍正間大軍駐哈密因轉餉始稍稍修治之有饋餉修路碑記山麓有古回紇墓相傳唐大將某西征俘回紇七人歸其一歿於途葬此後屢著靈異好事者爲醮金建屋覆其壟至今漢回經過必拜之祈輒應匾額充棟亦有施錦障墓上者五色跋邈年久積至尺許壟後怪石穿空凹凸崎嶇橫亙數十

昨鏡

步距此五里許山麓產白黑星星石

即石英大者世呼為水晶磨作

緩隸皆此類也

戟芒圭角儼若削成土人以鍬掘取跗萼

相銜大小闊狹皆視下鍬時以為衡其面則頑

劣雜石翻轉用之瑩澈可愛以作筆格頗不俗

又此石能催生磨水飲之立產關祠案前星星

石一座高二尺精光燦燦至是舍車而徒下峻

阪乃登車初山巔峻絕過者數折輪損人畜劉

襄勤錦棠撫新始鑿新路里許然石骨嶙峋終

不可平行者至此必徒步以防意外故勒碣以

戒過客焉

氣丙嶺

新疆圖說哈密東南至氣丙達坂五百六十里與

安西州連界

案氣丙嶺在星星峽之東

已上哈密境內支山

月宮台山

新疆圖說月宮台山在鎮西廳城南門外十里

沙山

西域水道記沙山長十許里牧馬者入山深處夜

聞鈴鐸音相傳昔覆軍於此後漢書西域傳呼衍

王將三千餘騎寇伊吾伊吾司馬毛愷遣吏兵五百人於蒲類海東與呼衍王戰悉爲所沒沙山正蒲類東也招摩多河流經其東北

案沙山子在松樹塘東石河子三羣馬廠夏秋間移牧沙山子鎮西大河一名水磨河一源出沙山南曰柳條河一源出沙山北曰招摩多河西流四十餘里合爲一河又十里至沙山子莊距城二百二十里伏流三十餘里至三縣戶莊北草湖中湧出是爲大河入巴爾庫勒淖爾

阿勒扎噶勒山

西域圖志阿勒扎噶勒鄂拉在庫舍圖達巴西北東南距鎮西府城八十里山脈自西五十里之和洛圖達巴東北行綿亙百餘里與鎮西府北境哈套察罕哈瑪爾阿達爾干諸山相接爲天山之分支

鄂什奇山

西域圖志鄂什奇鄂拉一名獨山子卽阿勒扎噶勒鄂拉支峯在巴爾庫勒淖爾南十五里一統志鄂什奇山在鎮西府西南十五里

案鄂什奇今圖作鄂什希卡倫在鎮西城西五

十五里再西卽獨山子一統志謂山在鎮西西南十五里者誤

哈套山

西域圖志哈套鄂拉在阿勒扎噶勒鄂拉西西里克拜城東北東南距鎮西府城一百八十里山脈自西來南接托來達巴東行爲鎮西府境北屏

察罕哈瑪爾山

西域圖志察罕哈瑪爾鄂拉在哈套鄂拉東巴爾庫勒淖爾之北南距鎮西府城四十里
一統志察罕哈瑪爾山在鎮西府東北四十里

案蒙古語哈瑪爾鼻也俗語以山梁爲山鼻土人以山名海故巴爾庫勒淖爾又稱哈木哈瑪爾淖爾也

阿達爾干山

西域圖志阿達爾干鄂拉在察罕哈瑪爾鄂拉東一百六十里舊木城之北阿拉克椿濟郭勒流其東西南距鎮西府城二百里

案新疆圖說北木城卡倫在鎮西城北九十里山蓋在木城北百里外也土人呼爲木城達坂庫克托木嶺

西域圖志庫克托木達巴在阿達爾干鄂拉東哈喇和屯之西北山脈自哈套鄂拉東行爲察罕哈瑪鄂拉又東爲達爾阿干鄂拉至此又東北行五百餘里踰鎮西界入於砂磧漢書武帝紀天漢二年貳師將軍出酒泉與右賢王戰於天山注晉灼曰在西域近蒲類國去長安八千餘里師古曰卽祁連山也匈奴謂天爲祁連今鮮卑語尙然後漢書明帝紀永平十六年遣奉車都尉竇固出酒泉伐北匈奴破呼衍王於天山十七年遣奉車都尉竇固駙馬都尉耿秉騎都尉劉張出敦煌崑崙塞

擊破白山虜於蒲類山遂入車師注河西舊事曰白山冬夏有雪故曰白山匈奴謂之天山過之皆下馬拜去蒲類海百里之內魏書高車傳彌俄突與蠕蠕主伏圖戰爲伏圖所敗西走三百餘里伏圖次於伊吾北山唐書地理志伊州伊吾縣有折羅漫山亦曰天山案漢貳師將軍與右賢王戰於天山出酒泉而近蒲類國今之鎮西府卽舊巴爾庫勒爲匈奴東蒲類王茲力支地則此天山應在鎮西府境也漢敦煌太守裴岑誅呼衍王碑刻現存竇固破呼衍王於天山在唐伊州北擊破白山

山脈三
竇
虜遂入車師在蒲類海百里之內唐伊州爲今哈密及鎮西府漢車師爲今吐魯番是竇固破虜之處當在伊州之南車師之西所謂天山白山者自今托來嶺至塔勒納沁山東西綿亙之山皆是哈密及鎮西漢爲伊吾廬地於魏入蠕蠕則魏書所謂伊吾北山卽指伊吾廬北境之山可知唐書稱折羅漫山亦曰白山蓋一天山而古今異名者云在伊吾柔遠北則亦不外哈密及鎮西境內矣又按舊一統志於哈密境內載有但密山據元和志山北二十里正抵蒲類海之文謂但密山在哈密

東北而以元和志所稱繞海多良田漢將趙充國屯者爲無據今考充國傳前征奴匈奴後征先零羌屯田係征羌時事先零羌居西域之南充國屯田以隔絕羌胡在北祁連山之南決無北踰天山而屯於蒲類之理又元和志稱但密山在納職縣北一百四十里唐書納職縣以鄯善故城置在玉門關西則元和志所云蒲類海者當卽蒲昌海境與南羌相近充國所屯宜在於此而但密山之不在哈密境內可知也

一統志庫克托木嶺在鎮西府西北

于里格山

案于里格山在鎮西廳城東北二道柳溝莊之東莊在城北一百四十里

必濟山

西域圖志必濟鄂拉在庫克托木達巴北一百二十里地當孔道南東北踰山至華烏里雅蘇台折而西北行二百餘里爲古爾畢達巴入天山北路界

一統志必濟山在鎮西府西北當孔道入伊犁案雍正十年大學士伯督巡陝甘經略軍務鄂

爾泰奏言賊於八月初五日在北路額得尼昭爲我兵所破自鄂爾坤河源推河遁按逆賊敗走畢濟一帶中間有袞塔瑪哈戈壁乃畢濟要隘去巴里坤不過三百餘里今考畢濟卽必濟袞塔瑪哈戈壁卽北山外蘇海圖地方

阿濟山

西域圖志阿濟鄂拉在必濟阿拉東北一百里當孔道南通哈喇和屯一百里

一統志阿濟山在鎮西府西北四百里

以上鎮西境內支山

以上說西嶽內支山

一條志謂南山亦屬西嶽

其說前志無據

西嶽圖志謂南山亦屬西嶽

其說前志無據

南山亦屬西嶽

其說前志無據

南山亦屬西嶽

其說前志無據

山脈志卷三終

言類第八頁正頁五

